



Isambilisho Lya Bena Nikola

na

Rev. William Marrion Branham

Isambilisho Lya Bena Nikola

Ukusokolola 2:15, “Ifyo fine wakwata abaikate sambilisho lya bena Nikola, icintu ico Napata.”

Mwalaibukisha ukuti naliletele mu Nshita ya mu Efese ukutula ishiwi, Nikola, lyafuma ku masihi yabili aya ci Greek: *Nikao* cipilibula *ukucimfya*, kabili *Lao* cipilibula *ulukuta*. Nikola cipilibula, “*ukucimfya ulukuta*.” Nomba mulandu nshi iciabela icintu icabipa sana? Cintu icabipa sana pantu Lesa tatala ukubika ulukuta Lwakwe mu maboko ya butungulushi ubwasalwa ubwenda na mano ya mapolitiki. Abika ulukuta Lwakwe mu kusakamana kwa balashikwa na Lesa, abaisushiwa no Mupashi, abaume abekalila Icebo abatungulula abantu ukupitila mu ku balisha Icebo. Tapatulula abantu mu mabumba pakutula amabumba yaletungululwa na bushimapepo ubwa mushilo. Cishinka icakutula ubutungulushi bulingile bwaba ubwa mushilo, lelo nakabili no lukuta lonse lulingile ukuba. Ukutwalilila, tapaba iciputulwa mu Cebo umo bashimapepo nangu bakapyunga nangu abamusango uyu bapapatila pakati ka kwa Lesa na bantu, nangu palibapo incende apo bapatulwa mukupepa kwabo kwakwa Shikulu. Lesa afwaya bonse ukumutemwa no ku Mubombela capamo. Ubwina Nikola bulonaula filya fintu no kupatula ba kapyunga ku bantu no kulenga intungulushi ukuba bashikulu pa banabo mu cifulo ca kuba ababomfi. Nomba ili sambilisho ukuba lyatendeke ngo mulimo mu nshita ya ntanshi. Cilemoneka kwati ubwafya bwaba mu masihi yabili: “abakalamba” (abantu abakalamba) kabili “naba kangalila” (ba bishop). Nangu Ilembo lilangisha ukuti kwaliba abakalamba abengi muli cila lukuta, bamo batendeke (Ignatius umo pali bena) ukusambilisha ukuti amano yakwa bishop ni umo uwacila bonse atemwa ukwete amaka aya kutungulula abakalamba. Nomba icishinka ca mulandu we shiwi “umukalamba” lilangisha ifyo umuntu aba, ilyo ishiwi

“bishop” lilanga iofeshi lya muntu umo wine. Umukalamba e muntu. Bishop e ofeshi lya muntu. “Umukalamba” lyonse abakabili cilangisha lyonse ku kukula kwa muntu muli Shikulu. Te mukalamba, te pa mulandu wakutila alisalwa atemwa ukulashikwa, na fimbiko, lelo pantu MUKALAMBA. Alishibisha, uwasambilishiwa, te muteku, uwasubilwa pa mulandu wa kwishibisha kabili na bucishinka pa mulandu wakuba umwina Kristu uwakosa panshita ntali. Lelo awe, ba bishop taba shintilile pa nkalata shakwa Paulo, lelo lyena baile ku milimo yakwa Paulo pa nshita aitile abakalamba ukufuma mu Efeso ukuya ku Miletus mu Milimo ya Batumwa 20. 17 ilembo lyatila, aitile “abakalamba” elyo na versi 28 betwa bakangalila (ba bishop). Kabili aba ba bishop, (ukwabulo kutwishika abamano ya ma politiki no kufwaisha ukuteka) bakonkomeshe ukuti Paulo apele ubupilibulo ubwa kutila “bakangalila” bali abapulamo ukucila pa mukalamba wa pa ncende imo uwakwete icifulo ca bukalamba mu lya mwine fye mu lukuta lwakwe. Kuli bena bishop ali ni ulya uwali na maka ayacilile pa ntungulushi ishingi isha mu fifulo ifyalekena lekana. Itontonkanyo lya musango yu lyali nalimo Mumalemba atemwa mwi lyashi lyakale, lelo no muntu uwa mibele yakwa Polycarp ashintilile ku kabungwe ka musango yu. Eico, cilya icatendeke nge milimo mu nshita yakubalilapo capangilwe nge sambilisho iline line kabili eflyo caba na lelo. Ba bishop neliline basosa ukuti balikwata amaka ukutungulula abantu kabili no kubabomfya ngeflyo balefwaya, ukubabika apo balefwaya muli bukapyunga. Ici cikanya ubutungulushi bwa Mupashi wa Mushilo Uyo uwasosele, “Mpatwileni Paulo na Barnabas pa mulimo uo nabetilako.” Ici caba mukanye-Cebo na mukanya -Kristu. Mateo 20:25-28, “Lelo Yesu abetile ukwisa kuli Wene, kabili atile, Mwaishibo kuti bakateka ba Bena fyalo baumyo bukateka pali bene, na bakalamba babo baumya lupaka pali bene. *Lelo te kuti cibe ifi mull imwe*; lelo uwa muli imwe uufwayo kubo mukalamba, abe kapyunga wenu; no wa muli

imwe uufwayo kube mfumu, abe umubomfi wenu: ifyo Umwana wa muntu taishile ku kupyungilwa, lelo ku kupyungila, no kupela umweo Wakwe icilubula ca pa bengi.” Mateo 23:8-9, “Lelo imwe mwiitwa Rabi: pantu Kasambilisha wenu Umo, noyu ni Kristu; na imwe bonse muli aba bwananyina. Kabili mwiita uwa pano isonde tata: pantu Shinwe Umo, Uwaba mu mulu.”

Pa kucilenga ukumfwika bwino ukucila apa, lekeni nondolole ubwina Nikola muli uyu musango. Mwalaibukisha ukuti mu Kusokolola 13:3 iletila, “Kabili namwene umu uwa mitwe yakwe ngo wakomenwe ku kufwa: ne mpumo ya mfwa yakwe yali poshiwe: kabili abape sonde bakonkele iciswango balepapa.” Nomba natwishiba ukuti umutwe uwakomwa cali ubufumu bwa Roma uwa Cisenshi, yalya amaka ayakalamba aye sonde aya ma politiki. Uyu mutwe waliiminine nakabili nga “Ubufumu bwa Roman Catholic ubwa mu mupashi.” Nomba lolekesheni ici bwino bwino. Cinshi ico Rome wa cisenshi wa mapolitiki acitile ico icali ishintililo lya kulunduluka kwakwe? Ena, “alesalanganya no kucimfya.” Lulya e lwali ulubuuto lwa Rome — ukupatulula no kucimfya. Ameno yakwe ayacela yalelepula no konaula. Uo alepwile no konaula tekuti eme nakabili nga lintu aonawile Cathage no kumushika mu mucele. Ulubuto lumu lwine ulwacela lwashele muli wene ilyo aimine ngo lukuta lwabufi, kabili na mafunde yakwe yatwalilila ukuba cimo cine — ukupatulula no kucimfya. Ici e bwina Nikola na Lesa alibupata.

Nomba cishinka icelyashi lyakale icaishibikwa bwino nganshi ukuti ilyo ici cilubo caingile mukati ka lukuta, abantu batendeke ukulwisha iofeshi lya bu bishop necalecitika cakutila ici cifulo calepelwa ku basambilila sana abaume aba mano ya mapolitiki kabili abalunduluka mu fyuma. Amano ya buntunse ne mitantikile fyatendeke ukusenda icifulo ca mano ya Bulesa kabili no Mupashi wa Mushilo tawa tungulwile nakabili. Ici cali mucine cine icabipisha, pantu ba bishop

baishile tendeka ukusambilisha ukuti tacalefwaikwa nakabili imibele ya bwina Kristu iyapwililika ku kupyungila nalimo Icebo atemwa imilimo mu lukuta pantu cali umulalilo kabili no kusefya ifyali ifikankala. Ici casuminishe abaume ababi (bakabepa) ku konaula umukuni.

Pakuba na masambilisho ayapangwa na bantu ya kusansabika ba bishop pa ncende ishishapelwa kuli bene mu Malembo, ulutampulo lumbi ulwakonkelepo lwali ukuleta ifyakulumbwilako fya pusana ifyakulilwe mu buteko bwa bukapepa; pantu bwangu bwangu kwali ba Archbishop pa mulu wama bishop kabili ama cardinals pa mulu wama archbishops kabili pa nshita iyakwa Boniface'wa citatu kwaliko papa pali bonse, *Pontiff*.

Ukubikapo ne sambilisho lya bena Nikola kabili no kwampana kwa Bwina Kristu pamo no bwina Babylon icintu icaishilebapo caishileba ico Esekiele amwene mu Cipandwa ca 8:10, “Awe naliingile no kumona; kabili moneni e pali ifilengwa fyonse fya fikulika, ne finama fya makankamike, ne milando yonse ya kupashanya iya ba ng'anda yakwa Israel, fyashilwa pa cibumba ukushinguluka uku no ku.” Ukusokolola 18:2, “Kabili abilikishe na maka, ne shiwi lya kosa ati, Nawa, nawa Babylon mukalamba, aisabo bwikalo bwa fiwa, icifungo ca mupashi onse uwakowela, icifungo ca cuni conse icakowela ne ca kulengo butolo, ico ifyalo fyonse nabanwako umwangashi wa cipyu ca bulalelale bwakwe.”

Nomba ili sambilisho lya bena Nikola, ili lifunde iyabikilwe mu lukuta talyabombele bwino nganshi ku bantu abengi pantu balebelenga inkalata ishaibela atemwa ilyashi pa Cebo ilyalembelwe ku muntu uwa bulesa. Eico cinshi ico ulukuta lwacitile? Lwa tamfishe bakasambilisha abalungama no koca imifungilo. Batile, “Cisenda amasambililo ayaibela ku kubelenga no kumfwa Icebo. Cinshi nangu ni Petro atile ukuti ifintu ifingi ifyo Paulo alembele fyali ifyakosa ku kufyumfwa.” Panuma ya kufunyapo Icebo ku bantu, bwangu bwangu

caishileba ku bantu ukukutika fye kufyo shimapepo alesosa, kabili no kucita ifyo alebeba. Baitile cilya ukuba Lesa ne Cebo Cakwe ica mushilo. Bali cimfishe amano ya bantu no bumi no kubalenga abasha ba bushimapepo ubwalufiwa.

Nomba nga mulefwaya icishininkisho ukuti Ulukuta lwa Katolika lufwaya ubumi na mano ya bantu, kutikenki fye kwi funde lyakwa Theodosius X. *Ifunde Lyantanshi lyakwa Theodosius.*

Ili funde lyapelwe lilyaline panuma lintu abatishiwe no Lukuta lwa Ntanshi lwa Rome. “Ifwe fwe shamfumu shitatu tulefwaya ukuti abantu besu ukwabulo ku tenshiwa banakilile kuli bukapapa ubo ubwasambilishiwe na Petro Washila kubena Roma, ubo ubwasungwa mu cishinka ku ntambi kabili ubo nomba bwacetekelwa na kuli pontiff, Damasus waku Rome, kabili Petro, bishop wa ku Alexandria, umuntu uwamushilo waba Batumwa ukulingana ne ntambi sha Batumwa, kabili ne sambilisho lya Mbila nsuma; lekeni tucetekele mu mutwe wa Bulesa umo uwa kwa Tata, Umwana, na Mupashi wa Mushilo, uwa bumulopwe bumo bwine mu Bene batatu Abashila. *Tulepingula ukuti abakulakonka ici citetekelo bakalaitwa Abena kristu ba Cikatolika; tuleita bonse impelwa mano sha bukapapa bumbi ne shina lyabipa lya mashilu, kabili no kukanya abapilibulwa babo ukuiita ukuti ma chalichi.* Kunse ka kwebaula kwa bupingushi bwa bulesa, balingile ukusubila ukukandwa ukwa cilamo uko ubutungulushi bwesu, ubwatungululwa na mano ya ku mulu buli no kutontonkanya bwino ku kucushisha. . . ”

Amafunde yakulimuna ikumi na yasano ayo iyi mfumu yaletetele mu myaka iingi yaleseshe ba kabila wa mbila nsuma insambu shabo shonse ku kucita ifya bukapapa bwabo, bali batamfishe ku ma ofeshi ya buteko yonse, no kubatinya ku kubalipilisha, ukubasendele fipe, ukubatamfya mu calo kabili nangu ukucila ifyo, imfwa.

Namwishiba ifyo cili? Tuleya kuli cilya cine lelo.

Ulukuta lwa Roman Catholic lulaita ulwine Nyina wa lukuta. Alaita umwine ulukuta ulwantanshi atemwa ulwakubalilapo. Ico cishinka icine cine. Ali uwakubalilapo Ulukuta lwa Ntanshi lwa Rome ulwa bwekele kunuma no kuya mu lubembu. Ali uwantanshi uyo uwacitile akabungwe. Muli wene mwasangilwe imilimo ne sambilisho lya bena Nikola. Tapali nangu umu uwingakana ukuti ni nyina. Ena ni nyina kabili alifyala abana banakashi. Nomba umwana mwanakashi afuma mu mwanakashi. Umwanakashi ufwele ishakolokondwe aliikala pa mpili cine lubali sha Rome. Ena ni cilende kabili alifyala abana banakashi. Balya abana banakashi ma chalichi yaci Protestant ayafumine muli wene elyo kabili babwekele nakabili mu kabungwe no bwina Nikola. Uyu Nyina wa ma chalichi ya bana banakashi etwa cilende mukalamba. Uyo aba umwanakashi ushali uwa cishinka ku mulapo wa cupo cakwe. Aliupilwe kuli Lesa kabili aliile no kulacita ubulalelele na ciwa kabili mubulalelele bwakwe alifyala abana banakashi ababa fye nga ena. Uku ukuba pamo kwa nyina no mwana mwanakashi kwaba mukanya-Cebo, mukanya-Umupashi kabili icakonkelepo ni mukanya-Kristu. Eeh, MUKANYAKRISTU .

Nomba ilyo nshilati nje apatali sana ndefwaya ukulumbula ukuti aba ama bishop abakubalilapo batontonkenye ukuti bali pamulu wa Cebo. Baleeba abantu ukuti kuti balekelela imembu panuma-yakuyebelela lsho imembu. Cilya tacali icine. Batendeke ukubatisha utunya mu myaka imyanda ibili. Balecita ulubatisho nge cakupilibwilako. E mulandu wine abantu bali abasankanishiwa ilelo. Nga bali abasankanishiwa, lilya, mupepi sana na Pentecost, nomba baba mu musango uwapelelwa nganshi, ukuba nalimo imyanda amakana yabili ukutaluka ku cine ca ntendekelo.

Owe, Ulukuta lwakwa Lesa, kwaba fye isubilo limo. Bwekeleni ku Cebo no kwikala na cena.

ISAMBILISHO LYA KWA BALAAMU

Ukusokolola 2:14, “Walikwata uko abaikate sambilisho lya kwa Balaamuuwasambilishe Balaki ukupose ca kupuntwinsha ku bana bakwa Israel, ku kubalengo kulya ifyaipailwe amalambo ku tulubi, no kucito bulalalele.”

Nomba teti mukwate fye imitantikile ya bena Nikola mu lukuta kabili ukwabulo ukukwata ili limbi sambilisho ukwisamo, nalyo. Mwamona, nga cakutila mwafumyapo Icebo ca kwa Lesa kabili no kwenda kwa mupashi nge nshila ya kupepelamo (“abo aba Mpepa balingile uku Mpepela mu Mupashi na mucine”) kanshi muli no kupela abantu umusango umbi uwakupepa nge cakupyana, kabili icakupyanisha cilumbula ubwina Balaamu.

Nga twalaumfwa ifyo isambilisho lya kwa Balaamu lyaba mu lukuta lwa mu Cipingo Cipyu tulingile ukubwekela kunuma no kumona ifyo cali mu lukuta lwa mu Cipingo Cakale no kulibika ku nshita ya citatu kabili no kulileta mpaka kuli ino nshita.

Ilyashi lisangwa mu Mpendwa Icipandwa 22 mpaka 25. Nomba twaliishibo kuti Israel bali abantu abasalwa na Lesa. Bali ba Pentecosti ba bushiku bwabo. Babutukile mukucingililwa pesamba lya mulopa, bonse balibatishiwe muli Bemba Wakashika kabili balipitile ukufuma mu menshi, ukwimbila mu Mupashi kabili no kushanina mu maka ya Mupashi wa Mushilo, ilyo Mirriam, kasesema mwanakashi, alishishe malimba wakwe. Cisuma, panuma ya nshita imo iyabulendo, aba bana ba Israel baishile kuli Moab. Muleibukisha fintu Moab ali. Ali umwana umwaume wa kwa Lot ukupitila mu mwana mwanakashi wakwe umo, na Lot nao ali umwipwa wa kwa Abraham, eico Israel na Moab bali ulupwa. Ndefwaya imwe mumone cilya. Abena Moab baliishibe cine, nangu baleikalila pali cena atemwa iyoo.

Eico Israel aishile ku mpaka wa kwa Moab no kutume nkombe ku mfumu ukuyasosa, “Tuli bamunyina. Lekenitupite

mu mpanga yenu. Nga abantu besu atemwa ifitekwa fyesu twalya atemwa ukunwa icili conse, tuli nokulipila ne nsansa.” Lelo Imfumu Balaki alisangalele nganshi. Ilye ntungulushi ya lilye bumba lya bena Nikola tayali no kusuminisha ulukuta ukupita ne fishibilo fyakuko ne fipapusho ne filangisho ifyalekana lekana ifya Mupashi wa Mushilo, ne finso fyabo ifya lebalika no bukata bwa kwa Lesa. Cali icakuleto mwenso, pantu kuti alufya bamo mwibumba lyakwe. Eico Balaki alikene ukuleka Israel ukupitamo. Nakuba, ali kwete umwenso sana wa bena, icakuti aile kuli kasesema wa cilambu uwitwa Balaamu no ku mwipusha ukupapata pakati ka ena na Lesa no kulomba Impalume ku kutipa Israel, no kubapokolola amaka. Kabili Balaamu, pa kufwaisha ukusangwamo mu malyashi ya fya mapolitiki no kuba umuntu umukalamba, ali ne nsansa sana ukucite co. Nomba ukumona ukuti alingile ukupalama kuli, no kupokelela ubwasuko kuli Lesa ku kulenga abantu batipwe, apo tali no kucicita umwine eka, aile mukwipusha Lesa nga enga kwata insambu Shakwe ukuya. Nomba bushe ico tacaba fye nga abena Nikola twakwata naifwe ilelo? Balatipa uli onse ushilekonka inshila yabo.

Ilyo Balaamu aipwisha Lesa ku kupelwa insambu ku kuya, Lesa ali mukenye. Iyee cilya cali kusuma! Lelo Balaki, alikonkomeshe, ukumulaya ifilambu ifikulu no mucinshi. Eico Balaamu abwekele kuli Lesa. Kabili nomba ubwasuko bumo ukufuma kuli Lesa nga bwali ubwalinga. Lelo te kuli Balaamu uwakwete ubufwayo bwakwe. Lintu Lesa amwene ubucenjeshi bwakwe, Alimwebele ukwima no kuya. Bwangu bwangu aninine pali punda no kutampa ukuya. Nga aliishibe ukuti ici cali fye ubufwayo bwa kwa Lesa ubushapwililika kabili nga tabatipile nangu aile imiku amakumi yabili no kwesha imiku amakumi yabili. Filya nga Balaamu eflyo abantu bali ilelo! Balacetekela muli ba Lesa batatu, bala batishiwa mu fyakulumbwilako fitatu mucifulo ce SHINA, kabili lelo Lesa akatuma Umupashi pali bena nge fyo Acitile pali Balaamu, kabili bali nokutwalilila ukucetekelo ukuti bali fye abalungama nganshi, kabili apa epo bali mucituntulu abena

Balaamu abene bene. Mwamona, isambilisho lya kwa Balaamu. Twalilila te mulandu. Cicite mu musango obe. Batila, “Cisuma, Lesa natupala. Kuti caba fye bwino.” Ninjishiba Namupala. Nshilekana ico. Lelo ninshila imo ine iya kabungwe iyo Balaamu asendele. Kususha Icebo cakwa Lesa. Lisambilisho lya bufi.

Eico Balaamu aile uwafulungana ukuya mu musebo mpaka malaika ukufuma kuli Lesa aiminine mu nshila yakwe. Lelo ulya kasesema (bishop, cardinal, chairman, president kabili general overseer) ali uwapofula nganshi ku fintu fya ku Mupashi kwi tontonkanyo lya ku cindikwa no bukata ne ndalama icakuti talemona na malaika uwaiminine no lupanga naikata. Ulya aliiminine ku kucilinganya kasesema uwapena. Kapunda akanono kali mumwene ka butukile uku no ku mpaka mukulekelesha apunkishe ukulu kwa kwa Balaamu ku cibumbili ce libwe. Punda ali lekele ukwenda kabili tekuti aye. Tekuti acicite. Eico Balaamu alitolweke kabili atendeke ukula muuma. Elyo punda atendeke ukulanda kuli Balaamu. Lesa alekele ulya punda, ukulanda mu ndimi shimbi. Ulya punda tali wa sankanishiwa; [hybrid—Kelula] ali ni mbuto ya ntendekelo. Atile kuli kasesema uwapofula, “Bushe ine nshili punda obe, kabili bushe nshikusenda mubufuma cumi?” Balaamu alyaswike, “Eah, eah, uli punda wandi kabili ulansenda mu bufumacumi mpaka nomba; kabili nga tawaende, nalakwipaya...iyee! cinshi ici, ukulanda kuli punda? Cintu icakusekesha, nacilatontonkanya nacumfwa punda alelanda kabili nacila mwasuka.”

Lesa lyonse alalandila mu ndimi shimbi. Alilandile ku mutebeto wakwa Belshazzar elyo na pa Pentecosti. Alecicita nakabili ilelo. Kusoka kwa bupingushi ubuli mupepi no kwisa.

Elyo malaika alengelwe ukumoneka kuli Balaamu. Aebele Balaamu ukuti pa mulandu wa punda nga uli uwafwa nomba pa kwesha Lesa. Lelo lintu Balaamu alaile ukubwekelamo, alituminwe ukuya nakabili no ku konkomeshiwa ku kusosa fye ifyo Lesa amupele.

Eico Balaamu aliile no kupanga ifipailo cine lubali ifya nama ishasangululwa ishelambo. Aipeye sukusuku ukulangisha Messiah uwali no kwisa. Aliishibe ifyo alingile ukucita ukupalama kuli Lesa. Alikwete ifibombelo bwino bwino; lelo te maka; cimo cine nga nomba. Bushe ta mulecimona, abena Nikola? Ulya Israel palya pesamba mulya mu mupoka poka, ukuninika ilambo limo line, ukucita ifintu fimo fine, lelo umo fye e wakwete ifishibilo ukumukonka. Umo fye e wali na Lesa pakati kabo. Imimonekele tayakamutwale nangu kumo. Teti cisende icifulo ca kulangisha kwa Mupashi. Ici e cacitike ku Nicaea. Balibikilepo isambilisho lya kwa Balaamu, te sambilisho lya kwa Lesa. Kabili baliipunwine; eah baliwile. Baishileba abantu abafwa.

Panuma lintu ilambo lyapangilwe, Balaamu ali uwaiteyanya ku kusesema. Lelo Lesa akakile ululimi lwakwe kabili tekuti abatipe. Ali bapalile.

Balaki alikalipe sana, lelo tapali nangu cimo ico Balaamu engacita pa busesemo. Cali landilwe na Mupashi wa Mushilo. Eico Balaki aebele Balaamu ukuya kulya kwisamba, mu mupoka poka, no kulolekesha panuma shabo ku kumona nga teti kube inshila imbi iyo engabatipilamo. Ubucenjeshi ubo Balaki abomfeshe bucenjeshi bumo bwine babomfya nelelo. Ifilonganino ifikulu filalolekesha pa tuma bumba utunono, kabili necili conse ico basanga pakati kabo ku kupangilako ilyashi libi balalifumya no kulibilisha. Nga ba bwikashi bwa nomba baikala mu lubembu, tapali nangu umo usosa akantu pali lwena; lelo lekeni umo uwabasalwa aye mubwafya ne pepala lyonse ilyelyashilili nokucibilisha mu nko yonse. Eeh, Israel alikwete ifilundwa (fyabuntunse) fya numa. Balikwete imbali shabo ishishali ishakutashiwapo; lelo nangu cibe ukukana pwililika kwabo, mu kufwaya kwakwa Lesa ukubomba ukupitila mu kusala, ni mukusenamina kabili te mu milimo, **BALIKWETE IKUMBI MU KASUBA KABIL NE NTUMBA YA MULILO MU BUSHIKU, BALIKWETE**

ICILIBWE ICAFWANTWA, INSOKA YA MUKUBA KABILI IFISHIBILO NE FIPAPUSHO. Bali abashininkishiwa — te palwabo abene beka, lelo muli Lesa.

Lesa takwete umucinshi nangu umo pali balya abena Nikola nama PHD's, LLD's nama DD's yabo kabili no tubungwe twabo tonse utusuma ne fya wamisha ifyo umuntu engaitakishapo; lelo Alikwete umucinshi kuli Israel pantu balikwete Icebo icashininkishiwa pakati kabo. Mucine, Israel tamoneke uwa waminishiwa sana pakuba uwafuma fye mu Egupti mukubutuka kwabo ukwakalabana, lelo bali abantu abapalwa nelyo line. Fyonse ifyo atala ukwishiba pa myaka ukucila imyanda itatu cali ukucema imikuni, ukulima amabala kabili ukuba abasha mukutine mfwa ku bena Egupti. Lelo nomba ali umuntungwa. Ali umuntu uwapalwa ukupitila mu maka yakuteka yakwa Lesa. Mucine Moab alolekeshe pali wene. Ne nko shimbi shonse ishashala shalicitile, nasho. Utubungwe lyonse tulalolesha palya pa bashaba mutubungwe, kabili limbi kuti, mukupatikisha, ukubaleta mu kabungwe atemwa ukubonaula nga teti baikumeko.

Nomba umuntu umo kuti anjipusha, “Munyina Branham, cinshi icikulenga ukutontonkanya ukuti Moab ali bungene ilyo Israel ena tali? Nikwisa ulefumya ayo amano?” Ndeyafumya muno mwine muli Baibele. Yonse yalepashanyiwa muno mwine. Ifili fyonse ifyalembwa mu Cipingo Cakale ico icaba mu musango we lyashi fyalembwa ku busuma bwesu pakuti twingasambilila ukufuma kuli fyena. Ici cili umu mwine mu Mpendwa 23:9, “Pantu ukutula ku mulu wa fimabwe ifyasansuka ndemumona, kabili ukutula pa tupili ndemubebeta; mona bantu abaikala BEKA, kabili TABAITUNGA ABA MU NKO.” Ifyo e fyo cili. Lesa ukulolekesha panshi ukufuma pa mulu wa fimabwe, te mu mipoka poka imo ukulolekesha ububi bwabo no kubebaula. Lesa ukubalolekesha umusango Afwaile ukubamona — ukufuma ku kulepa kwa citemwiko ne nkumbu. Baikele BEKA kabili tabali ababungana. Tabakwete imfumu. Bakwete kasesema, kabili kasesema alikwete Lesa muli wene

ku Mupashi; kabili Icebo caishile kuli kasesema ne Cebo caile ku bantu. Tabali ba ku U.N. Tabali ba Kabungwe ka Machalichi Yesonde, kuli ba Baptists, Presbyterians, Assembly of God atemwa ibumba ilili lyonse. Tabakabile ukubako. Baikumbinkenye kuli Lesa. Tabalekabila ukupanda amano ukufuma ku kabungwe akali konse – bakwete “Efyo asosa Shikulu” pakati kabo. Hallelujah!

Nomba nangu cibe mucishinka ukuti Balaamu alishibe ukupalama ukwalinga kuli Lesa kabili kuti aleta ubusokololo ukufuma kuli Shikulu ukupitila ku maka yamo ayaibela, ali nelyo line, pali fyonse filya, bishop mwi bumba lyabufi. Pantu nicinshi ico acitile nomba ku kwato bubile kuli Balaki? Apangile ipange umo Lesa ali no kupatikishiwa ku kukanda Israel mu mfwa. Nga filya Satana aishibe ukuti kuti alembeleka Eva (ukumulenga ukuwila mu lubembu lwa ku mubili) eico ukulenga Lesa ukuleta ukulanda Kwakwe kwa bupingushi bwa mfwa pa lubembu, eico Balaamu aliishibe ukuti nga kuti alenga Israel ukubembuka, Lesa ali no kubakanda mu mfwa. Eico apekenye nshila ukubasenda ukwisa kulya no kwampana mu lubembu. Atumine ubwite ubwakwisa ku malila ya ku Baal-peor (iseni kuno mupepe na ifwe). Nomba Israel, ukwabulo ukutwishika, alimwenepo amalila ya bena Egupti eico tabacimwene ukuba icalubana sana ukuya no kulolekeshako fye kabili limbi ukuyalya na bantu. (Cinshi icalubana no kulongana mu nshila yonse? Tulingile ukubatemwa, bushe tatulingile, atemwa mu musango nshi twinga baleta?) Ukuba cibusa teti kukalifye uli onse – atemwa efyo batontonkenye. Lelo ilyo balya ababulalelale abanakashi ba ci Moab batendeke ukushana no kulafula ilyo baleshinguluka sinjonjo no kufwenkula, ulunkumbwa lwaliimine mubena Israel kabili balitintilwe mu bucende, kabili Lesa mu cipyu aipeye amakana amakumi yabili na yane ayabena.

Kabili filya efyo Constantine na bamupyene bacitile pa Nicaea kabili na panuma ya Nicaea. Baliitile abantu bakwa Lesa ku musonkano. Kabili ilyo ulukuta lwaikele ku kulya,

kabili no kwima ku kwangala (ukulya ku mimonekele ya lukuta, ukusefya, kabili na malila ya busenshi ayainikwe ku micitile ya bwina Kristu), ali iketwe; alicitile ubulalelale. Kabili Lesa alifuminepo.

Ilyo umuntu uli onse afuma ku Cebo ca kwa Lesa no kuilunda ku lukuta mucifulo ca kupokelela Mupashi wa Mushilo, ulya muntu alafwa. Uwafwa! Ifi eflyo aba. Mwiilunda ku lukuta. Mwiingila mu kabungwe kabili no kusendwa na mafundisho ne ntambi atemwa icintu icili conse ico icisenda icifulo ca Cebo no Mupashi, atemwa muli abafwa. Ninshi capwa. Muli abafwa. Ukupatulwa kuli Lesa umuyayaya!

Ico e cacitike mu nshita ili yonse ukutula lilya. Lesa alapokolola abantu. Balafuma ukupitila mu mulopa, ukusangululwa ku Cebo, ukwenda ukupita mu menshi ya lubatisho kabili no kwisushiwa na Mupashi; lelo panuma yakashita icitemwiko cantanshi cilapwa kabili umuntu umo alakwata amano ayakuti balingile ukubunganya pakutula bengaicingilila abene beka no kwipangila ishina ilyabo beka, kabili balailonganika abene beka kulya kwine kunuma mu nkulo yacibili kabili inshita shimo ilyo nangu talafika. Tabakwata Umupashi wakwa Lesa nakabili, imimonekele fye ya bukapewa. Balifwa. Bali isankanya abene beka na mafundisho ne mimonekele kabili tamwaba ubumi muli bene.

Eico Balaamu alengele abena Israel ukucito bulalelale. Bushe mwalishiba ukuti ubulalelale bwakumubili e mupashi umo wine usangwa muli bukapewa bwa bunganishiwa? Nacisosa ukuti umupashi wa bulalelale e mupashi wa kabungwe. Kabili bonse ababulalelale bakakwata icifulo cabo muli bamba wa mulilo. Ifi eflyo Lesa atontonkanya pa tubungwe. Eah mukwai, cilende mukalamba na bana bakwe abanakashi bakaba muli bamba wa mulilo.

Ifilonganino tafyaba ifyakwa Lesa. Tafyatatale ukuba kabili tafyakatale ukuba. Mupashi uwalubana upatulula abantu bakwa Lesa muli bushimapepo no lukuta; kabili caba, e

mulandu wine, mupashi uwalubana upatulula abantu ukufuma ku bantu. Ifi e fyo akabungwe ne filonganino ficita. Mu kubunganya balaipatula abene beka ukufuma ku Cebo cakwa Lesa, no kuileta abene beka mu bucende bwa ku mupashi.

Nomba moneni ukuti Constantine apele amalila ayaibele ku bantu. Yali malila ayakale ayabusenshi na mashina yapyia ukuyafumya ku lukuta, atemwa mu nshila shimbi imicitile ya bwina Kristu balibulile no kuibifya no kusefya kwa fya busenshi. Abulile ukupepa kwa mulungu kasuba no kubupilibwila ku Mwana wakwa Lesa. Mucifulo cakusefya pa December 21, ico icaba ilyo balesefya amalila ku mulungu kasuba, bakubikile mpaka pa December 25 kabili bakwitile ukufyalwa kwa Mwana wakwa Lesa. Lelo twalishiba afyelwe mu April lintu ubumi bwisa, te mu December. Kabili babulile amalila ya kuli Astarte no kuyeta ukusefya kwa Easter umo umwina Kristu alingile ukusefya imfwa no kubuka kubafwa kwa kwa Shikulu. Mucituntulu cali amalila ya busenshi kuli Astarte.

Babikile ifipailo mu lukuta. Babikilemo ifimpashanya. Bapele abantu ifyo baitile ifisumino fya batumwa, cibe tekuti mu cisange muli Baibele. Basambilishe abantu ukupepa ifikolwe ico icilenga Ulukuta lwa Roman Catholic ukuba ulukuta ulwapulamo ulwa mipashi mwi sonde. Icuni conse icakowela cali muli cilye cifungo. Kabili mwalikwata ba Protestant pamo no tubungwe twabo ukucita icintu cimo cine.

Balile ifintu ifyapelwe amalambo ku tulubi. Nomba nshilesosa ukuti ici cilepilibula mucine ukuti balelya mubutuntulu inama ishapelwe amalambo ku tulubi. Pantu nangu akabungwe ka Yerusalem kalandile ukukanya ifya musango yu, Paulo talandikishe sana pali cena nge fyo aselese ukuti utulubi tatwali kantu. Cali fye pa mulandu wakwa kampingu kano fye uko capunwishe munyina ushakosa kabili elyo tacasuminishiwe. Ukubikapo nafimbi, ubu Busokololo bwaba ubwakuma ku Benafyalo kabili te ba Yuda apo ishi ni

nkuta sha Benafyalo. Ndemona ici mu lubuuto lumo lwine mwena amashiwi yakwa Shikulu, “Kano fye mwalya umubili Wandi no kunwa umulopa Wandi tamukwete umweo muli imwe. Umuntu takekalile umukate weka lelo ku Cebo conse icifuma mukanwa ka kwa Lesa.” Kuti mwamona ukuti ukulya cilanda ukulyako mu mano ya bumupashi. Eico ilyo aba bantu balefukamina ku fimpashanya, ukwasha amakandulo, ukubomfya inshiku shakutusha sha busenshi, ukuyebelela imembu shabo ku bantu (fyonse ifyo fyaba kuli bukapapa bwa kwa ciwa), balelila pamo na ciwa kabili te kuli Shikulu. Bali mukupepa utulubi nangu basumine atemwa ukukana. Kuti balanda fyonse ifyo balefwaya ukuti ifipailo ne cushi ca cena cisuma fyaba fye ifyakubebukisha amapepo yakwa Shikulu atemwa icili conse ico batontonkanya ukuti cipilibula; kabili kuti basosa ukuti ilyo balepepa ku cinso ca cimpashanya caba fye pa mulandu wa kukonkomesha; kabili ukuti ilyo bayebelela kuli shimapepo, ni kuli Lesa bacicita mucine cine mu mitima yabo, kabili ilyo basosa ukuti shimapepo ala babelelo uluse, acicita fye mwi Shina lya kwa Shikulu; kuti basosa ifyo balefwaya lelo balelyako mu bwaishibikwa bwino bukapapa bwa mu Babylon, bwa kwa Satana kabili na bailunda abene beka ku tulubi no kucito bulalelale bwa ku mupashi, ico icipilibula imfwa. Bena balifwa.

Eico ulukuta no buteko fyaliupene. Ulukuta fyali yampene pamo no tulubi. Na maka yabuteko ku numa yabo bamwene kwati nomba, “Ubufumu na bwisa kabili ubufwayo bwa kwa Lesa nabucitwa pe sonde.” E mulandu wine Ulukuta lwa Roman Catholic talulelolesha ku kwisa kwakwa Shikulu Yesu. Bena tabacetekela mu millenium. Nabakwata millenium yabo pano pene. Papa aleteka ino ine nshita kabili Lesa aleteka muli wene. Eico nga Aisa, ukulingana na bena, cilingile ukuba ilyo imyulu ipya kabili ne sonde fyateyanishiwe. Lelo baliluba. Ulya papa mutwe wa lukuta lwa bufi, kuli no kwisabako millenium, lelo ilyo cilya cileisa mukucitika takabemo mwene. Akaba ku ncende imbi.

UKUSOKA

Ubusokololo 2:16, “Lapila atemwa nga taucitile ifi nkesa bwangu kuli iwe, elyo nkalwa nabo ku lupanga lwa mu kanwa Kandi ”

Cinshi cimbi eco Engasosa? Bushe Lesa kuti acilukila ulubembu lwa abo abalumbula Ishina Lyakwe apafye? Kwaba fye inshila imo ukupokelela inkumbu munshita ya lubembu, LAPILA. Uyebelele ukuti naulufyanya. Isa kuli Lesa ku kubelelwo luse kabili no kupokelelo Mupashi wa kwa Lesa. Ili lifunde ukufuma kuli Lesa. Ukukana umfwila nimfwa, pantu Atile, “Nkacito bulwi naiwe no lupanga lwa mu kanwa Kandi.” Iciswango cacitile ubulwi na bashila, lelo Lesa akacito bulwi ne ciswango. Balya abalwile ne Cebo bakasanga ubushiku bumo Icebo cilelwa nabo. Cintu ica kutinya ukufumyako, atemwa ukulundako ku Cebo ca kwa Lesa. Kuli abo aba cipilibwile, kabili bacitile kuli cena ukulingana nge fyo ca balingile, inga impela yabo ikaba shani lelo imfwa no konaulwa? Lelo nelyo line inkumbu shakwa Lesa shicili shilebilikisha, “Lapila.” Owe, ifyo yawama amatontonkanyo ya kulapila. Tapali ico ndeleta mu maboko yandi, lelo ku lupanda Lwenu eko ndeikatilila. Ndeleta ubulanda bwandi. Ndelapila ukuti naba fintu naba, kabili ifyo nacita. Nomba caba umulopa, tapali cimbi lelo umulopa wakwa Yesu. Cikaba ni cinshi? Ukulapila, atemwa ulupanga lwamfwa? Cili kuli iwe.

(Ukufuma Mu Kulangisha Kwa Nshita Sha Nkuta CineLubali)

BEMBA

©1995 VGR, ALL RIGHTS RESERVED

VOICE OF GOD RECORDINGS

P.O. BOX 950, Jeffersonville, Indiana 47131 U.S.A.

www.branham.org

Icishibisho ukufuma ku mwine kalemba

Insambu shonse tashisuminishiwe. Ili buku kuti Iya lembwa pali pulinta yapa ng'anda ku kubomfya kwa muntu pa lwakwe nangu ukupela, ukwabula amalipilo, nge cipe caku sabankanya Imbila nsuma iya kwa Yesu Kristu. Ili buku tekuti lishitishiwe, ukulembululwamo ayengi, ukubikwa pa mwela, ukusungila muli ba mashini, ukwalula mu ndimi shimbi, nangu ukuli bomfya ku kulomba indalama ukwabula insambu shalembwa na ba Voice Of God Recordings®.

Nga mulefwaya ukwishibilapo nafimbi nangu ukufwaya na fimbi ifyabapo, twalomba tumeni kuli ba:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org